



王磬山房遺稿卷之六

眉山王毓宗相 甫著

門人溫臯謨爾弼甫

詹爾達思理甫較

男王世鴻儀達甫輯

書啓類

與黃九石

一從睽迹踪跡萍蓬鴈鴻南北睇詹光範如隔  
霄泥記王署講業老年丈百為提植驩隄骨肉

感念離索河山綿邈親就無從惟是猶庸寡與  
孱弱易搖明春未審得瓦全否所賴老年丈主  
持公道覆露者不淺也茲因同鄉李于玄之便  
附此布候于玄行履文章月評所推重服闋至  
都門倘得留補史職為蜀山川吐氣蜀紳之大  
願也第今科議停選而時事有未可知在造命  
者所栽培李生于老年丈為對房門下士曩觀  
老年丈引掖後進高誼勤勤矧李生歸依墻仞  
故是藥籠中物伏斲齒牙餘論委曲轉達成就

之併諭以機會以便進止或以其文行操履  
黨不至阿所好破格補留乃為至幸如東觀果  
停則移文改限具疏陳情惟老年丈示之指南  
蜀中縉紳當共戴有不矢灰糜竭頂踵以圖報  
於知己又可知也別久未暇寒暄拳拳以蜀紳  
所共懇者上瀆想老年丈能俯亮而宥其率爾  
也臨頴主臣蜀中大饑家窶無可侑緘者別幅  
乃弟下里土物表一芹之獻惟莞存之幸甚

與來路然

一別將遂三禩夏初翔便曾附八行日者得脩  
齡丈名園詩乃知起居佳勝第未審何日脂車  
北上弟悵蓬麻之既遠指松菊而長逃昕夕在  
念渴思知己不為晤言耳諸暨汪令癸丑南宮  
所薦士也其人紉蘭握瑾潔志純衷鳧鳥所飛  
施為當迥然聞諸暨俗稱難治弟已具懇脩齡  
丈望於貴省善地力為轉移計足下命駕還朝  
之時正汪生鳴絃有緒之日過省城面兩臺司

三齋山房 卷之六 三  
道諸公斲鼎呂吹噓送上想鄉紳公論當路定  
所取信也弟昨歲病中獲王龍溪先生文抄讀  
之不覺霍然弟未覩全集又聞湖中新刻有東  
坡先生易書詩三傳便携相示百朋不啻老境  
寒局作蠹魚萬卷中致足樂也故敢相乞惟留  
神海雲燕樹相望依然叅對有期諸不覩縷

與王希泉

自庚子都城一別十五禩於茲緬想顏教踪跡  
河山未由瞻晤惟翁亮節忠謨人寰嶽峙呈肝  
披腹扶 日轂而正 天樞誠歲寒之孤標朝  
陽之絕響丘園抗志襟宇清曠頤時事多艱無  
人心如風林沸鼎棟隆未至大厦疇支天欲治  
平安車蒲輪行且迎袞舄於江水之濱矣不肖  
宗待罪筆札亦思得一當以自效而 青宮輟  
學屢為催請 天聰彌高虛庸充位尸素懷愆

實慙曩日之造就倘秋中再疏不報即當投劾  
而歸理烟霞之業矣遠承手教長跼捧讀益增  
馳翹令親試卷乃史局諸公衡校容托之拔置  
前列不腆用佐名園一觴臨書耿切

荅吳本如公祖

治某西鄙監儒草野後進每從絢履末竊仰墻  
仞如泰符麗天可望而不可即不啻蜀有天幸  
獲蒙老公祖節鉞臨照下土頃令江漢澄清巴  
渝變俗蜀之士民高其名於泰山北斗慕其德  
於慶雲景星戴其澤於高天厚地某與耄倪朴  
舞同也建南郡夷頑悍倣擾邊圉蜀紳皇皇聚  
族嘆息計無復之賴老公祖精忠體國專慮  
籌邊遐荒將吏嚮風改色治生謏陋何知戎馬

之事第封疆大計勦撫機宜惠此中國以安四方寔惟老公祖託重而恃力遙聞臺下倜然念窮簷之彫困識洞幾微慮周久遠士無冗費將鮮匿情於摧陷廓清之中寓止戈不殺之意外靖夷氛內恤民艱俾疆事早結一日之局則閭閻受一日之賜古稱吉甫憲邦諸葛天威曷以加焉幸甚幸甚某即不嫺於辭當勉竭其愚磨崖紀烈於相嶺蒙嶺之間與蜀人士晨香夕燈千萬年同永永也肅此再謝餘不盡覲縷

復尹惺鹿

客歲過秦秉燭引觴綵雅愈局玄言片晷塵勞頓醒泊則弟托廬松楸一去三載鴻鴈南北莫繇聞問再入都門甚違初念俄有傳老年文解組還蜀者夫老年文 天子所恃長城以紓西顧也乃節槩嶽嶽直與秦華共嶙峋視一官如委羽飄絮然恐司馬獨樂之園席未煖而趣召矣弟偃蹇執戟甫叨一階金華之幄久矣未御徒糜大官有覲其面意將歸理烟霞之業歛

虛役之精神杜非分之榮進以愜所願也樊兄  
來承手教當托史館諸公置前列第未知掌院  
臨時移動否肅此奉復餘不盡言臨風結約

不竟  
荅楊脩齡

自違顏槩歲序殷流離心超忽不覺一襖俯慙  
碌碌羈栖塵網未得歸理烟霞之業兼之同心  
離索日有惆悵耳方切懸馳荷械既遠及感慰  
可知聞省方將竣計攬轡澄清必有竦然改觀  
易聽者欣慶欣慶承示精氣神數語真養性盡  
性之格言大都心神定則精氣自充昔人謂綿  
綿若存曰若者言存而無所存也此在恍惚靜  
定中自為玄會吾儒不睹不聞本體內真機竅



也近來文字之障頗欲謝絕惟稍喜讀易以謂  
出世經世盡在是書養氣攝生特其緒耳第苦  
見聞未廣淵中有古名家為易傳詁若誠齋易  
傳之類幸以相示望之望之日者晤陳星海言  
台丈留神於不佞携其書相眎可謂軫存之至  
惟有辦香禱頌於上蒼耳前後所惠頻繁為補  
葺張氏園內書屋之資已成齋心兀坐於中尤  
荷大厦之庇也使旋值量移之冗草草申謝餘  
不竟覩縷

荅彭嵩螺

蜀之疆事積靡日久蓄寇養禍發於一旦邊圉  
之危譬之水決火炎且就浸淫焦灼士民皇皇  
震恐賴老公祖以社稷之鎮狩斧俯臨周咨窮  
簷拊循民瘼其戡定規模已制勝於掌握之間  
復清問下民採於芻論起劉將軍於田間精神  
渙汗三軍耳目頓肅改觀摩旗秉羽一戰再戰  
以至犁庭掃穴築京觀於遐荒奏捷書於 殿  
陛自武侯渡瀘之後蕩平廓清之勛未有若此

之神速者也蜀紳寓都門者無不喁喁舉笏相慶以謂老公祖精忠定力擔當幹濟而其間一片苦心真足格鬼神貫天日然劉將軍冒矢石披瘴霧不難誓死以殉國家之急其義烈之氣可謂不忝其前人矣所恃一二忠賢協恭共事而意見參差遂致爭抗成忿夫蘭蕙之誼千古高之故避車非怯遷史稱其退而讓頗名重太山今則不然已足慨矣更欲掩其勞而傳其過安能令介冑之士弭然屈服乎廟議自明

必不使有烏盡弓藏之悲令後來荷戈捐軀者解體也遠承手教備極公平忠懇不獨憐才其鴻猷閭澤拯念蜀氓者至矣敬服敬謝餘不盡  
覩縷

與聶井愚

違闕三禩都門再奉顏架九畹芷蘭有香滿國  
 投契莫逆不任瞻依六符之光委照雲間政譽  
 蜚騰偃室宓堂維卓維魯日來得晤徐蓋夫津  
 津頌高猷大澤為三吳冠冕豈猷不佞弟割耀  
 分華即錦玉雪峨之靈若增而重濟而深矣敬  
 羨敬羨秋來木葉盡脫引睇南望遥想旌麾燁  
 然煖被襦袴雲雷鼎呂實始基之異日 臨軒  
 召對大書特書弟叨在史氏榻管埃馬茲因蓋

夫還里附布惓惓蓋夫之祖文貞公先君座師也又青神余司隸與之有肺腑姻以故于弟世誼姻誼交遊夙矣其文學行誼克紹先聲在翁臺按部中計必鑒識其賢益知文貞之後世有清德也瞻對何時臨風結約

與韓晶字

恭惟老年丈繡斧巡行霜臺肅重弟不宜有瀆然以師生之情不得已冒昧輕聒悖弗自寧伏惟慈亮兩浙鹽運司吳運同諱從誠曩以甲午分考蜀中弟乃其經房門下士也初仕袁州府推官再陞湖州府同知真才真品苦操苦心蒙兩臺特薦補今官計老年丈行部所至必能廉知其賢而奇之母俟弟贅禱而門墻之誼有不能一日釋者載惟老年丈綜鑒人倫敦崇交道

海內無兩倘蒙俯賜蔣培而振起之母論弟座  
師懷國士之感灰糜之報弟當永矢弗諼也瑣  
瑣臨楮悚息

與張鴻岫

數襖違闊深夜譚心令人耳目改易神情飛揚  
不覺酣酒矣弟奉差還蜀積有米粟今奉一張  
少申涓滴之獻以供從者一飯幸翁兄揮存之  
母曰寒曹飯冷而拒其輜褕幸甚幸甚餘容面  
布不一呵凍草草

或不一而求字草

...

...

...

...

回李光素

不佞樸簌之質此窳無能幸以同里同館之誼  
獲奉暉華私心投注比於莫逆判袂來裘葛再  
易各天瞻望僻居山樊日益深密而又處蜀之  
南偏郵書罕便不敢以隻字通於京華貴人即  
辱石交若門下亦聞問缺然是不佞離索之罪  
也春間趙光宇伴來訊門下起居不佞自謂謏  
薄得倚龍門庶幾愚情有所嘉賴再閱邸報乃  
不其然門下鼎呂之珍 社稷之鎮當不諱之

朝立得言之地開泰長否消之運收乾清坤  
夷之功使君子有所恃憮邪有所畏是所望於  
門下也昔歐陽子不言文章以政事為急蘇子  
瞻不矜科目以氣節為高且以勤一世以盡心  
於藻績為可悲兩賢豈謬言以欺世哉國朝名  
公鉅卿其樹風節顯當世躋八座而勛業巍然  
者皆可指數亦願自立何如固知不以史局留  
不留為重輕也不佞山林骨相多病侵尋尚未  
見糞土之胤寒蟬蟄鳥皮骨僅存所願門下當

軸秉樞為衆正倚毗俾不佞徜徉九嶺三流間  
鼓腹而歌太平之賜沾溉多矣遠承魏械大貺  
專使遠頒何物草野當此靈寵用情之厚荷德  
之深筆舌難悉使旋值冗肅此附謝容圖嗣布  
不一

與王墨池

頃者祭戟過下里紫氣燁然自三台而屬三峨  
弟邀靈譜謀夙高北斗之瞻托身塵氓更辱青  
雲之盼玄言接鄰清風穆如別來日有馳嚮麟  
符嚴重憲紀摠持風行霜肅天人闔懌歌功頌  
德覃及龍荒治弟幸與耄倪游息於春臺玉燭  
之內株守草野不獲一申賀悃罪歎可知乃承  
老公祖記存之厚魏牘遠頒大貺俯及情典隆  
碩獎飾逾涯益深踧踖治弟山林病骨得謝筆



札之後妄希枯楊之閨退棲櫟社日惟杜戶冀  
免愆尤所望老公祖亟正台軸霖雨海宇俾弟  
鼓腹而歌其賜厚幸矣使者旋草草裁謝伏惟  
涵鑒不一

與張芋田

郊關一別欲圖再晤而祭戟遠發遂瞻望弗及  
至今台階渺闊悵然離索昔人魂銷之語更似  
未盡耳薊門當輦轂之下所謂社稷之衛年  
丈長城屹然威稜瞻乎殊域即山川改色麟閣  
之勲此其始基之不亦霜飛星爛乎哉弟株守  
寒局罔所事事日惟丘壑是懷三徑未荒幸得  
歸棲櫟社以全天年所欣願耳陳與偕丈倏爾  
觀化頃會余完初不覺相顧沾襟緬憶當年五

三齋山房 卷之六  
子已逝其二浮世直如幻泡弟衰白更種種矣  
啁秋不越蓬蒿每默以自嗟命世之業于年丈  
日幾幾望之也茲因同鄉周君之便附此佈候  
周君名爰諷富順人乙酉歲在成都為弟筆研  
交一官拓落其家口僑寓大梁貧不能歸中州  
人士深憫之王開府曾有書薦之於蹇理翁所  
將圖南旋計年文篤誼梓里必所加意幸垂矚  
睐此陰德事萬種矣餘容端佈不盡覲縷

與上洛殿下

久聞龍門嶽嶽幸以使事獲遂扳登恭惟好善  
忘勢之懷千秋曠見禮過於梁遊而情榮於楚  
醴矣抵中牟敬此申謝蜀筵六握檢散筭獻上  
遙想九華五明涼生殿閣而寒峻之士所携持  
者製皆麓拙木工為媿里言容便中托健吾寄  
致旅次冗極不盡覲縷

荅王韋軒

台丈自青衿時蔚有鵬搏豹變之奇泊上公車  
蜀人士誦其卷津津擬南宮如拾芥迨臚傳  
玉殿名冠璇魁咸謂名不虛附士貴夙養其錦  
江玉壘之滙靈耶其長卿淵雲之流亞耶弟於  
長安望嶽立之標聆霏屑之誨雖二三見而叔  
度千頃之波季野四時之氣至今心醉焉頃者  
萬方輯玉紫氣東來以入闈之禁未獲晤言而  
此心有耿耿者無端忽有吳宗伯之說此從來

蜀人說為未有矧台丈之才之德端謹正大粉  
榆所素稱乎吳疏到日弟躬於閣部已剖白之  
里中臺省二三兄弟亦為扼掣不平也 國家  
人才當培養愛惜欲重一人之事而寃及十七  
人若台丈尤為寃之寃者非久公論自明願益  
懷明誼奮揚清時勿為浮議所動它日徵拜可  
俟區區歸倚之念雲天在上臨函增注

荅任丘劉老師

遠辱老師手教眷頤隆渥感德深重綸命有華  
壽母多慶真人世稀逢 朝廷異寵偶值令弟  
大司空公之變縉紳無不嗟悼所望老師達觀  
曠覽用以自慰且以上慰太師母計 聖心簡  
注爰立弘施非遠此朝野中外所同祝而顯揚  
更有加於斯也猥承賜委粗效楮毫微言可採  
已叨葑菲之榮大賚是頒曷任瑤瓊之貺謹九  
頓上璧并謝薄儀附申涓滴伏惟老師不以輜

三齋山房 卷之六 莊  
藝而揮存之臨函倍切馳注

回黃老師

客歲金臺拜違老師顏教謝病山中百慮廢窳  
再入都門水土不習藥裹相尋株守寒局台階  
瞻望未獲一申候悃踈節之罪義無所辭頃因  
冷生奏記老師垂慈極力庇植錫以郵符導之  
還蜀肉其白骨而生之在三之恩與乾父坤母  
而並大矣豈獨七十子之遭即敝里諸人士啣  
德共不朽也更辱魏械渥貺幣重詞溫百朋不  
啻仰戴明賜增之躡踏門生職在編纂往讀止

稅大疏令人拊膺投匕不平長安諸縉紳咸謂  
民生轉困天聽彌高不意衣冠中有此舉動  
老師亮節直道褫奸魄而奪之氣屹然天之一  
柱在齊魯間矣再披全帙真足為世道太息使  
旋肅佈腹心臨楮悚息

與趙玄華

金臺睽闕三易裘葛昕夕未嘗不馳翹於蒼厓  
碧鷄間也恭惟老先生人倫柱礎宗社鼎彝蘭  
臺石室至今炳炳麟麟聲稱爛於日月之際  
帝心簡在人望攸歸撫綏南服益懋鴻猷八  
柱承天行膺莞軸粉榆共嘉賴之矧姻黨素辱  
覆露如不佞者乎不佞蹇淺未學自分妄庸頃  
借一差澣沐還里林泉避影日益深密半畝之  
宮數椽之室課校兩侄懶逸成性一丘一壑足

藏不肖之軀於願甚愜也遠承溫棧大貺情典  
隆碩感篆罔既肅此附伸謝私臨楮不盡覩縷

與門生馮抑菴

蜀當番徠不靖 天子軫願我氓萌選才望素

著者往足下銜綸西邁岷峨錦渝不啻列長城

而奠九鼎而不佞株守萬里弗克執贄負弩惟

舉笏望符光為賀且為枌榆慶也茲有瀆者巴

縣蹇生宗臯故司馬理菴先生之仲子曩以年

少未閱世務為人誘惑遂與禍會邇且怵慮前

行從此勉奮可以不墮家聲矣居都門且久蜀

紳咸愛重之比於謝庭蘭也司馬業蒙上念疆

場功為之褒卹第錫命酬庸雖出朝恩而推  
庇撫孤寔藉明賜宗臯歸日望足下垂念簪履  
之遺力為保持俾竣大典則蜀紳咸邀光寵微  
獨司馬結草九原也餘在張田二兄公啓中瑣  
瑣伏唯亮之幸甚別無贅賡

答徐雅池

弟以駘駑幸緣枌榆之誼混跡驥羣依麻漸芷  
徒以一念樸誠為翁臺收采氣味投幸視儕輩  
有加焉鉅賢當路善類知歸躡景希光不無彈  
冠之願使輶南指益復誨庇罕所稟承政懷瞻  
望不畝抗章請沐悠悠我思曷勝繾綣重以一  
蹟孤踪子烏寡與俯慙鹿鹿羈身塵網儲學  
久輟自知瘵曠頃欲借差退棲櫟社未克如願  
徘徊歧路未知所裁秋中倘得假還便當裹足



寒巖尋盟鷗鳥也遠辱翰教深荷軫存人旋冗  
迫附謝同門稿一部奉公子覽政餘不盡覩縷

與胡崇齋

長安旅食荷翁臺垂情扮里雲天高誼視恒格  
有加歸來藥裹相尋萬慮廢窳豐草長林日益  
深密不敢輒以賤名姓干於典記踈節之罪可  
知也恭惟翁臺道先民覺忠簡 帝知晉參銓  
柄日月之際人望攸歸中外喁喁動色相賀歐  
陽子所謂邦家之光匪特閭里之榮也不肖蹇  
淺後進自分妄庸鷓鷯一枝於意甚適倘仗台  
庇獲全微節真有餘榮世路崎嶇此行如野麋

入市耳目駭觸翁臺曷以教之承諭盛伴同  
發途中倚伴不淺謹領台命冗中肅此申謝容  
圖專申不一

荅劉貞白

恭惟老先生閣下嶽峙鴻標淵涵鉅學三年禮  
室默孚帝賚之求一旦綸扉行慰囑瞻之望  
若乃藏山大業經世深猷朝廷注意於端賢  
四海傾心於名碩久矣生平願執鞭勒之心  
徼先世譜牒曩者謬被容接嘘提視恒局有加  
昕夕慶幸頃自違遠台光退棲櫟社倏忽三載  
入都門僅附荒槭倉率殊甚徒有懸馳不圖宣  
慈不鄙德音下頒重以綺貺逾於袞華盥滄百

拜感篆之餘惟有屏息謹此上謝并候台禧樞  
連虛左相麻佇渙某庶幾竊庇於未照嘉賴無  
極不竟欲陳臨風結約

寄同門劉年兄

弟屬有天幸獲附聲光於籍未且並出於劉老  
師之門年丈不鄙其固陋而引接之開心悅忘  
形骸投契之懽比於金石自後鴻雁南北羽翼  
參差聞問杳然各天瞻望葛藟屢易安得不悵  
然也老師清風懋德羽翼一世宜久延以副蒼  
生之望曾幾何時哲人云亡玉儀長謝吾輩梁  
嶽曷倚指南曷托緬惟曩時之知遇豈意一朝  
遂成千古天乎痛哉年丈遠聞計所悼駭矧弟

王齋山房 卷之六  
等目覩其威撫極長號百體俱廢神鬼若失何  
以為情耶伯子汝防奔訃來京慟絕復甦哀毀  
柴骨持索蕭然且聞老師廬產素薄而宿貸未  
償伯子莞然孑立殊可念也弟等勉為賻贖而  
心長慮短計畫無所復之年丈高誼厚德想悼  
賙有加潘兄尚未入都門晤日弟再為儀圖之  
弟等匏繫寒局魯場築室義慙端木玄塚負土  
事愧侯生伯子南旋望風隕涕敬附咫尺之函  
臨楮不盡翫縷

與丘長孺

客歲長安幸奉顏教杯酒論心投契莫逆別來  
東望三韓無日不翹首光塵也蓋古人籌邊必  
稱文武為憲之士而論將則曰敦悅詩書麾下  
天挺人豪嶽鍾雄雋胸中甲兵馬上檄草皆卓  
絕當世固不待摩旗秉羽而先聲雷震瀚海之  
波濤已倒流於數千里外矣欣欣賀賀往承手  
教兼讀新詩徒有珍服莫能和郢茲因敝州公  
役之便附此布候四人僉解遠經萬里皆尊先

公舊字之遺黎弟念其寒苦不無維棄之感望  
鼎呂轉達當事者速賜批回免其守候福田萬  
種矣臨函不盡瞻馳

荅尹惺鹿

弟自違顏教且五襪緬懷約履於錦水清流翠  
屏白石令人翩翩有五嶽汗漫之想乃若藏山  
大業經世訐謨挺然塵表旦夕霖雨舟楫則海  
內所延頸弟所昕夕而拱祝也改玉 賜環咫尺  
延佇 廟堂珍其羽儀世道藉以砥柱安得  
抗志烟霞盟心丘壑哉讀紀游入作仰見冲襟  
體物逸興干霄纚纚洋洋琳瑯觸目置之几案  
時一披閱令我神意飛越以當卧遊也弟年來

善病日就衰白俯慙碌碌羈棲塵網不能一日  
忘豐草茂林之思以俛老年丈出而正席鼎衡  
端士登朝萬物吐氣然後為耕釣之計耳遠辱  
手教草草申謝餘不盡覩縷

寄阮年兄

春明一別屢易星霜瞻望台堦河山濶隔株守  
寒局莫繇聞問離索之罪義無所辭茲瀆者新  
任廣東都司經歷曹念含其尊人會元公與先  
君同嘉靖癸丑榜念含文學行誼皆不媿其家  
聲詩藻翩翩尤擅場翰圃與弟聯社長安匆匆  
別去意甚黯然道經貴治雅慕龍門嶽嶽敢為  
先容想年丈薄雲高誼海內無兩而念含辱在  
梓未計覆露有加不俟弟之喋喋也冗中未暇

王堯山奏  
卷之六  
作寒暄語伏惟涵炤不宣

與陳心謙

桐奏微薰梅收餘潤遠想足下對揚殊綸駁政  
嶽嶽環境驩舞歲月易駛 簡召非遥吾黨共  
增氣色敬引領以望之邇來諸賢奮庸皆骨鯁  
魁壘之彥然精神意氣不盡用之於脩政立事  
而或用之於是非異同不佞有杞憂焉足下倘  
亦厯於時乎不佞棲遲冷局頭顱種種何物雞  
肋為此胃繫欲圖南歸理烟霞之業未審克遂  
初願否茲因敝年家惠州衛經歷吳一驪之便

附此布候一驪之先公與先太史同嘉靖癸丑  
榜其人才行俱能不隕其家聲倘足下按部所  
至念其明德之後幸爲之蔣培而噓植之不猷  
一驪啣戴世世即杭浙紳士共頌高誼於不朽  
矣瑣瑣輕聒歸頴主臣

與汪鶴坡

闊別以來遂成離索山川間之豈不軫懷昨得  
來路然書始知足下已蒞任干莫光茫在斗牛  
間一出而發於硯此政運斤迎刃時也茲有所  
懇者中翰朱樵峯以其姝夫童生駱方辰考試  
起送欲靳垂慈甄拔前列其詳具在原楮謹以  
奉覽弟居長安不敢預外事而樵峯金庭相公  
之孫詞林先後輩之誼頗篤且客歲在棘園所  
夕同事雅重其人故情有不容已想足下春風



化雨苑李一日成蹊此其一株也更惟亮其無  
它餘不盡觀縷

谷趙懷東

日月易駛友朋成濶企瞻符光山川間之停停  
浮雲昔人所思想兩地繾綣同也足下抗霜稜  
於南國每讀大疏俾國是明而朝廷重令  
人擊節令人有千仞鳳翔之思不意蜩鳴鼎沸  
之時風靡波頽之日而有忠厚正直兼至如此  
欽服欽服弟賤恙雖已平而猶庸寡與樣不合  
時儲學久曠既慙尸素成均之席猥厠代庖  
士習漸漓極力振刷挽旋一時未能願化每念

及此憤懣填胸愧汗露背坐瘵五斗無尺寸足  
述緣是自効三乞青山東裝候 命思返初服  
枕流漱石以終餘年未得所 請承台翰軫存  
豐儀遠及甚荷勤拳復聞有西河之痛惋歎久  
之恨不能縮地相慰所望達人洞觀為 國自  
愛世路縱橫握手未期涓滴附申芹悃南望吳  
雲不勝延結

又

頃吳浮玉掌科一疏其言公平正大蓋別有所  
指匪求備於弟政詞林之藥石也此公蜀隣舊  
父母甚有棠惠長安即不數數往來然夙心歛  
服之近來議論鼎沸波翻世道人心未知所底  
弟所自患者才疎技拙上無能輔養儲德下無  
能造就士風是以宵旦省訟至於人已毀譽之  
間名位升沉之際久奉教於左右矣唐荆川先  
生云當今只少一甯武子之愚夫吾輩獨立於

世碩影為儔而不懼者以真心涉世而無畛域  
於人也辱惠德音草草再謝并布腹心不盡倦  
倦

與年兄

敬瀆弟等駘駘叨附驥群十六年矣緬惟曩者  
受知劉喜聞老師恩同覆載不圖哲人既萎瞻  
依莫繇報塞無自幸其公子汝防克遵遺訓不  
墮家聲然老師清德矚然汝防攻苦下帷與寔  
人子無異族中亦并赤貧捉襟肘見頃聞陡有  
安福所指揮王廷詔攀入運冊報僉船漕渠家  
原係盧龍衛聽勾軍戶不隸本所碑冊可據今  
忽與禍會蕩破流離族中死逃相繼僅存一二

諸生控訴上官悒悒牢騷楚囚相對真可惻也  
年丈節鎮其地未知亦聞其事否追惟鑪錘之  
誼倘見其勢急而情悲當亦有不能恣然於中  
者伏惟鼎言轉達當事諸公賜之庇植昔者召  
公之德愛及其棠於物且然况其子孫乎計諸  
公念簪履之遺或曲垂高誼第弟等門墻之報  
頂踵莫惜自不能已於言耳謹此合詞控懇伏  
惟留神幸甚

荅李燦岩

不佞起田間再塵 朝序得懽然道故時聆玄  
提以開蒙鄙每從絢履後覩足下貞標亮識則  
嚮仰於層霄千仞之上又見一時賢傑方矜意  
氣競功名 廟堂之上幾成訟府惟足下以無  
着之念昌剛明正大之議成心客氣交泯於中  
則其度越於人已遠矣光華阻濶徒有懸馳得  
手教始知綉斧巡行綱紀一新三晉河山爛馬  
生色省方伊始而書中惓惓憫世恤民一片赤

心可貫天日尤爲敬服夫議天下事與任天下事難易更別茲固臺丈效忠建事之日爲國  
家分猷共念任一分則社稷蒼生受一分之益  
蓋不徒以言論爲經濟真足以挽衰季之敝習  
忻賀忻賀弟自客歲病後神理頓減  
青宮輟  
學尸食大官毫髮無補未嘗一日忘去志適緣  
藩封未就羣情驚疑職居羽翼未敢圖歸待  
時事既定會當逃峩眉而長往得藉手忠猷以  
爲報稱雖巖栖而喜可知也人旋冗中草復百

不宣一臨函耿切

荅蘇健吾

客歲一病幾化異物荷台丈軫存乃延殘喘今  
賤體頗復如前第麋鹿之性未嘗不在長林豐  
草間也京師風波漸息及此時為耕兩鋤烟之  
計圖鷓鴣一枝之安所望益懷明誼揚厲清  
時異日開府建牙於蜀訪竿綸于錦水之磯弟  
擊壤鼓腹而歌何有之賜于願足矣肅此再布  
底裏餘不盡惓惓

與江公子

弟對菲下體溝澮末流曩者老師柄衡西蜀偶  
以筆硯荒涼之業荷鑪錘特達之恩誼隆事三  
德埒鼎九矣違濶歷時再瞻顏教滋培拱把備  
凌風震雨之旃幪剪拂駑駘聆 崇議玄提之  
指授曾日月之幾何型模既遠音問為踈不圖  
一顧之知遂成千古之慟此弟等望泰東而雪  
涕滯斗北而含悲也哲人既萎慨往傷離腸日  
九迴臨風氣結莫繇匍匐几筵長號洩痛謹託

三蘇山房  
卷之六  
之誅言用寫哀衷師友存物縮結綢繆金石有  
泐心知難泯薄儀開具左幅伏惟鑒存弟等曷  
勝馳望切怛之至

荅劉總戎

不佞束髮時得謁先大將軍尊府君於眉山是  
時先岳張申丞明厓公暨先君俱相聚晤驪然  
道故先岳填撫應天識先大將軍於行間而先  
君則以壬子歌鹿鳴於省闈先大將軍奮鷹揚  
於錦里座主同門世誼不淺故不佞以小子得  
登龍辱樂頌云自後偃蹇淪躓草野無聞莫繇  
通賤姓名於下執事播之役大將軍以杜猷宿  
望威敵成功勲業隆然遽緣萋菲退處西山不



佞時方讀中秘書扼掣不平久之茲者番獮不靖擾我邊圉全蜀震動主上特函齎鉞馳授元戎此政國家託重恃力之日也大將軍英名勇畧久屯遐荒蠢爾小夷固將聞風自遁蓋不待摩旗秉羽而先聲雷震建南之災氛已掃蕩於千里外矣預賀預賀惟是干戈之禍未有寧晷閭閻輸將日見凋悴殊域之地險宜講悉患在窮兵深入剿撫之機權宜互用患在久師兆釁此蜀中諸縉紳所皇皇願慮者恃在世好不敢不聞於大將軍也若夫惠此中國以安四方此麾下之能事不佞臞然書生於幕府無能為後至於生平之所企仰慕說於麾下者前已言之大司馬想高明久之自聞也遠荷德音承家報國之情殷殷篤摯敬服敬服肅此申謝惟台鑒不宣

與何芝嶽宮允

弟以駘鴛謬逐驥群十有七禩矣荷仁兄恩勤  
提植不異填麓昨歲承乏南宮校士之役得追  
隨台席二十餘日玄津寶筏覺路金繩朝夕相  
依啓我蒙鄙披襟款悃飲食教誨此之爲感固  
非筆舌所能悉捐糜所能報也分袂以來忽越  
一禩伏想顏槩嘗存寤寐河山脩阻勞結何支  
日奔走畏途如野麋入市時懷駭觸兼自曩年  
病後日就衰頹安能強力異豎尺寸耶倘得退

棲櫟社與漁樵木石為伍則弟天幸甚厚願未  
敢期耳遙憶仁兄舞彩承娛老年伯母福事嘉  
祥綏於燕喜且秉揆在近朝野顒望至殷弟割  
耀分華真有私慶也茲因阮兄歸里之便附布  
候悃薄儀乃代言之饌用佐仁兄脩膝下七  
懽以申猶子千里鴻毫之忱惟不以輶褻而揮  
存之幸甚臨函曷勝神搖

荅顧桐栢

為別七載所懷萬端長安一片地曩與諸兄弟  
依麻漸芷剖心析肝乃今歧分星散相繼離居  
停停浮雲阻於言晤向風馳想徒有繾綣耳緬  
惟曩者年丈攬轡南天上維國是下軫民窮  
避驟吏民罔不額手竊幸儀刑所樹正士知歸  
矧在同籍同里尤為嘉賴詎謂歸而萊舍承歡  
輶車留滯歆艷清娛如在閩風崑崙之上第  
國事日棘人心鼎沸正賴大賢撐柱乾坤綱紀

朝路豈宜于徐高卧忘情魏闕乎弟本無心  
世途復就羈勒大負初志自前歲一病皮骨僅  
存矧儲學久輟野性難馴函圖退棲櫟社以  
遂豐草長林之思庶免曠素之羞耳不腆乃代  
言日給敬獻老年伯一觴以申猶子千里鴻  
毫之悃伏惟揮存幸甚兩承手教領悉已於科  
部為蜀藩少效周旋盖仰體年丈加意粉榆亦  
厚道中之公道也餘不盡觀縷

與張鴻坻

客秋入都門拜命之辱兼得立齋先生刻甚喜  
有頃而聞仁兄之擢曠瞻蒼梧令人短氣仗馬  
既遠鳴鳳緘聲甚矣世道之巖險難游也雖然  
一言忤乎末季干炆播其芳名汲長孺卧治淮  
南故亦不薄東方二千石金紫映照旌旄相屬  
凡所為拊循噢咻朝舉念而暮暨乎民矣若弟  
株守閑局從閑得懶從懶得病無足為仁兄道  
也久欲申候苦乏便羽適鬱林知州張呈象赴

任敬佈腹心呈象乃敵同年丘鶴峯之同榜且  
親厚友也弟晤於長安覩其人雅負經濟而器  
美琮璜才剗犀兕仁兄綜鑿人倫海內無兩倘  
庶其實而竒之賜以特達之恩則呈象啣國士  
之感而群吏可風矣瑣瑣冒聒臨發主臣

上郭青螺老師

伏以樞斗接台垣七蜀長城瞻偉伐日星輝  
聆昧千秋大冶遘鴻模青雲懷一顧之殊榮紫氣  
動三能之曉色恭惟老師老夫子函丈下全德  
難名至誠無技譚六經奧旨斯文璀璨匡廬闡  
列聖真傳大道潛通洙泗元氣在手則藩宣屏  
翰經綸出指顧之間造化由心則南北東西造  
就入鑪錘之內當 帝心之簡在惟名德之欽  
承獨峙麒麟位列公侯之上高峩獬豸節兼楚

蜀之尊十萬之甲兵運於樽俎半壁之天下賴以綏安西賊已寒直湏軍中之一范南人不反何難化外之三苗衝冠之怒始消滔天之罪已正還千年中國未有之土自宋氏玉斧割畫以後盡入版圖除三省共憤之克蓋伏波銅柱勲名以來始開宇宙然猶弘几几之度功成罔居懷翼翼之忠德高彌下 國家仗精神於元老夷夏瞻氣色於上台淡泊寧靜之風豈直掩映隆中高士勞謙挹損之度抑將超軼大樹流風

曩者蜀文有幸吾道斯南相馬得天機在牝牡驪黃之外求珠出象罔豈離朱契詬之知廓哉吹萬之恩實有在三之義而宗拙慙刻楮弱謝棲塵夙與七十子之從仲尼敢望牛馬走之續太史登之席珍之上拔之溝斷之中生則吾親成惟夫子國士遭逢之厚先人俎豆之恩斯固古今罕邁特達為知者也望安定之門而意為弟子傳尹公之業而料作端人內自揣以何堪凜不知其所報念栽培於既往已藉奉暉斬延

填於方來庶幾秋實幸茲翔鴻之便遙伸望斗  
之私伏惟台涵可勝惶悚

候劉老師

伏以鰲禁日高舊學倚均調之重鳳池春近新

蹊增爛熳之榮 國注安危天全忠孝恭惟老

師學為 帝師道航聖瀆結 主知而柱石九

埏之望光民覺而羽儀一代之英裁霧縫雲不

設人間爐鼎馭風騎氣迥依天上星辰蚤聯持

橐之班特簡 凝旒之眷定國本蒙休 主器

益將與日月齊光諫權政勅重 講帷奚第當

雷霆獨立 君臣千載重重聚三紀之期兄弟

卷之六

一家兩兩映上台之巴俄茹情于白雲之瞻望  
乃勇退于玉鉉之將升念篤烏啼瑞應紫芝白  
鵲情端萱草春深瑤圃瀛洲綠野蒼山炯炯雲  
龍矯翰壑流岫秀停停豹霧棲真况當商室之  
寤寐多年在帝夢已協築巖之傳叟且值熙寧  
之征求四出即人情願起居洛之温公此否泰  
消長之本原亦乾坤轉旋之機會覆金甌其久  
矣還玉鳥焉遲之某等夙逢陶冶濫側門墻學  
謝懷鉛染丹砂而欲化志慚晞驥景玄白以難  
前迹茲吹萬之恩悵望雲霄之庇凜乎在三之  
義生成塊北之中報乏啣環感深立雪薄言一  
芹之獻肅將千里之忱虔祝鴻禧遙申燕臆伏  
惟台鑒某等臨楮不勝悚息瞻望之至



候周寅所老師

門生樸櫟凡材蓬蒿下質本以塗泥之賤未有  
根核之深曩荷老師造士賢關主盟執柄文體  
還爾雅渾噩士習變茁軋枝駢大匠誨人以規  
矩準繩伯樂得機於驪黃牡牝遂使槍榆弱羽  
得借吹噓伏櫪駑駒會逢刷拂偶應弓旌之典  
遂成孺子之名原本起家發跡之因敢忘衆人  
國士之報黃榜開天上喜傳衣鉢於瀛洲蒼生  
望東山倏濶光塵於玉署且緣違教以後遂遭

家難之頻木石無知己其自放於林壑消塵未  
報乃致阻遠于門墻何期筆札不次之遷用僥  
君父非常之遇吳公之薦賈誼實在諸生之時  
叔向之識駿明本之堂下之採而某自幸溝中  
之斷棄夙蒙席上之寵珍積誠如山尺緘靡託  
緬憶二天之庇真爲數載荒莊悃款雖懷寸衷  
是歎茲因令侄相晤感今念昔益爲馳悵肅附  
候私并申不腆伏惟慈鑒臨楮曷任瞻馳

回李宗伯

伏聞揆席崇升制麻佇渙九重寤寐尊舊學於  
其盤八表清夷相中國之司馬洋溢天人之喜  
輝煌鄉國之榮恭惟老先生閣下道先民覺忠  
結主知粵從震鼎初潛首賴綺園之力迨茲  
恭符交洽獨高莘渭之求方將乘盛際之風雲  
抑且勵有爲之日月中台虛席望夙重於機衡  
顯面垂紳烈永光於諧弼晚宗辱庇枌榆附根  
飛李歸歎下里方鋤三徑之荒仰止慶霄忽覺

五雲之近厚託萬間之廣大忻遭一氣之陶成  
續王褒之章侯陳蕪頌望平津之閣莫綴賀賓  
敢申澗藻之私異鑒芹曝之悃更亮狂率特賜  
涵容晚生曷勝馳注悚息之至

達王公祖

宗駘鴛庸流受屢宇下吐握隆惠獲席先靈優  
承眇昧之私時切步趨之願邇聞中原攬轡旌  
麾攀望無從繼喜蜀甸借恂纏壘光華動色坐  
見三川絃誦居然萬里金湯社稷雍熙寔蒙  
庥貺山林喘息並荷榮施况忝簪履之遺尤屣  
煦涵之被茲有私請寔屬里情益州肇闢華陽  
文獻僅存朴野惟是岷麓侍御允為栢府孤忠  
雅志幼懷溫飽輕肥之不念勲名壯顯艱難夷

險之備嘗屬倭氛報警於三韓迺怒髮奮指乎  
七尺營中大星宵隕天地啣哀行問孤角聲悲  
英雄茹血在祭法有勤事之典幸 楓宸垂異  
數之恩酬庸特象乎初連增爵茂加乎卿秩  
遣諭之文初下 綸音回宿草之春曳履之信  
遙瞻薇省湛重霄之露九原倍生氣色諸孤久  
候音塵肅具魚箋代攀鳳止敢勤法駕俯賁荒  
丘封墓式閭豈獸古道之重烈蕪頑立懦抑且  
風教之攸關庶九重之德意不虛卽三壤之幽  
少慰曷勝荷戴之至謹啓

回王齊宇公祖

伏以託跡龍門久借露光於芝畹飛香鴈字忽  
噓雲氣於槐樞不圖樗散之微屢荷駢蕃之賜  
謹裁蕪啓仰謝弘慈竊惟大臣佩安危於一身  
盛世際明良於千載夙夜宥密獨高帷幄之籌  
宇宙清夷允見羽干之舞自非濟川之弘略孰  
成支厦之竒功恭惟老公祖臺下忠昭日月道  
際霄淵河海晏清見開濟經綸之業地天明察  
知維持社稷之心屬蜀黔兵端之甫寧而西南

民力之已竭伏老成之長慮佐景運之中興坐  
成道德之安強端賴規模之宏遠幹斗樞而北  
運扶日轂以東升克成厥終公有無窮之聞從  
欲以治民無不獲之天指揮伯仲伊呂之間弼  
成君民克舜之烈某幸緣編戶獲拜下風霖雨  
來蘇想草木昆蟲之有喜氛稷既奠覺山川城  
邑之咸新偶成田耕井鑿之謠用比聖主賢臣  
之頌生成良厚摹繪難工乃勤汪度注存忽枉  
巍函遠及誦華章之獎飾觸目琳瑯登珍貺之

陸離充庭綺縠啣戴彌切悚懼滋深輒脩附謝  
之言用代申中之悃臨楮曷勝感激馳仰之至

回劉老師

恭唯老師純忠報

國既聯喜起之交至孝宜

家更崇顯揚之典矧沙堤之將踐方膺調燮於

三台迨萊服之承權遽動扳號於一旦屢錫之

榮聚之百順一日之養不易三公 鳳綸頒異

數以慰幽冥鴻筆仰遺芬而傳紀載豈獨志事

光崇於子道抑且琬琰流播於人間此皆老師

身繫 宗社綱常之重故能感孚於 君恩友

譽之源而門生某等所不能以一辭贊者也茲

蒙來教已共恭赴沈老師函丈拜謝重承台諭  
欲查祭典一事謹具呈別楮伏惟崇鑒不宣

與王齋宇公祖

伏以制府持衡力奠坤維之重耳棠垂蔭人攀  
蜀園之轅情篤天經功高地軸恭惟老公祖臺  
下人倫柱礎 社稷鼎彝具吉甫文武之全猷  
蘊君陳孝友之令德夙承茂簡特進崇階巍然  
七蜀長城遂寢四郊多壘犴犴萬里鞏忠武之  
經營洙若千秋流召公之豈弟九廟壯覆孟之  
勢四方聳巖石之瞻金城既安於當年玉鉉預  
啓於它日述作際一時之盛魯拜後而周拜前



家國無兩視之心君則忠而親則孝佇晉元樞之位胡來風木之悲訃聞九重喆光九錫聽輦而思用頗收衮衣日望其遄歸當饋而嘆無蕭曹台斗已爲之虛席某等思源飲德割痛愴心敬貢蟻忱用申鶴吊陳炙絮而展素緘咫尺以抒丹伏願少紓蓼莪之思俯節宵旦之毀念伊周功業未竟斯世理亂攸關而廟堂倚毗方殷異時顯揚有待益加珍攝以慰微私臨精曷勝馳注之至

與趙玄華

伏以誼托薦蘿吉兆早傳於鳳卜盟諧金石和聲初應於睢求成二姓之良緣徵百年之締好事慚僭越喜溢攀緣恭唯 臺下清時先覺全蜀達尊家開蟬冕之英武接夔龍之業豸冠立漢殿都亭七貴尚憚白簡威名駟馬按河東汾晉萬家共沐皁膏惠包孝肅十年不仕心懷愛日瞻天司馬公早歲投閑名在黃童白叟眷懷綠野甞怡松菊之存屬睇蒼生佇簡塩梅之

任某粉榆蕪學樛櫟庸材瞻和璧於趙城竊末  
光於韓斗伏諗令嫵瑗瑤婉質久閑中壺之規  
而舍侄某常素寒門竊吳東床之坦過蒙台念  
俯聽柯言採既及乎菲葑投敢云于氣味山川  
相望葭玉依輝敬脩不腆之儀祈賜片言之諾  
其自先君以下世荷鴻慈豈惟棣萼同榮感深  
釐戴伏惟俯賜鑒納曷勝欣忭屏營之至

荅李涑玉方伯

伏以龍門高峻夙懷李御之榮鴈字焜煌特荷  
郇雲之寵瞻承彌切媿感交并恭惟臺下經綸  
鉅抱砥柱貞標長江大河之行地中吐作珠璣  
之潤金城湯池之在天下猶高尊俎之猷自呈  
漢殿之星辰隨作傳巖之霖雨人凜重關之豹  
奪闡臯於壺冰斧開恒嶺之雲淨狼烟於塞月  
民所歌舞天自簡庸澤中安鴻鴈之聲海上  
靖鯨鯢之浪家居日月之近地接蓬萊身膺龍

虎之符威揚沙漠利 國家安 社稷茲其時  
哉為 天子理陰陽孰先公者其草茅賤士蜀  
鄙寒踪神交方切於望塵雅翰忽先於傾蓋爛  
矣筐篚之實賁荒穢以知榮藹焉海岳之情撫  
壤流而轉惕拜嘉知寵稱塞殊慙附申一縷之  
私良媿七襄之報伏希炤鑒不盡頌言

與曹鴈澤

伏以一柱擎天共載澄清之駿茈百川注海更  
逢引納之鴻慈望履生輝披雲起抃九頓旌麾  
之下三熏竿牘之私恭唯老公祖臺下量包九  
寓道貫三才起斯文之衰若昌黎兼秦壁漢壘  
而振響任天下之重如伊尹集夷清惠和而大  
成宏名蚤擅龍門上第捷題鴈塔卿月夙懸仙  
掌人欽一代羽儀使星朗映峨眉 帝倚三川  
屏翰鞏忠武開濟之業斷 國論瞭然鑑衡主

歐陽翰墨之盟愛人才過於珠璧宗藐爾俗子  
僻處遐荒無明師良友授以規模乏洪河泰山  
博其聞見蠹魚之嗜多癖自同蟲蚓之鳴麋鹿  
之性尤踈未脫山林之氣尚恐時人之竊笑云  
何郢論之獎推知己甚深老人謂孺子之可教  
揆才不稱拙工得大匠而為師再拜雄篇益深  
欣躍琳琅散落竦觀揮灑於雲煙琬琰襲藏終  
恐取將於雷電蓋發之以節其芬遠而澤之以  
道其根深惟夫子得兼而有之在草野何幸以  
覩此借後生以名譽愛重緇衣奉前輩之法程  
滌深華袞偶緣藥畧之延滯因之芹曝之濶踈  
葵寅久積乎龍光澗悃少申乎魚素既佩決北  
之賜尚祈繩芥之成莫罄敷宣伏祈崇鑒宗曷  
勝馳仰悚忭之至

朱貞度父母請啓

伏以鰲冠三山漢殿卿雲扶旭日麟分五玉蜀  
天良翰倚專城敬潔樽壘偕陳蘊藻恭惟老父  
母臺下琮璜清潤鍾呂冲和筆捲江濤朗徹散  
華脊之瀑氣衝劔匣精神峻僊掌之峯杏花看  
遍長安燕市風雷起鳳使星喜來益部錦川梧  
竹棲鸞人推一代羽儀帝倚百城師帥共猷袴  
襦之遠頌拱聞台鼎之先聲宗等幸以編萌獲  
在宇下惟我蜀南之良二千石得藉海內之真

第一流謹詹日敢邀大雅之臨俯錫未光之賁  
瓊芬咫尺頊融鄙吝之心咳唾九天斬副企跂  
之望曷勝欣荷之至



